

REGIONAL NEWS

HEADLINES:-

1. Chief Minister Pu Lalduhoma chuan nau piang hlim thihna a tam leh tam loh chu ram hmasawna thlen chin hriltu pawimawh tak a ni a ti.
2. Sports Minister Pu Lalnghinglova Hmar chuan kum 2036-a India ramin Olympic a thlen turah Mizo thalai a tam thei ang ber tel tura hmalak a ni a ti.
3. Telegu Desam Party Chief Nara Chandrababu Naidu chua Andhra Pradesh Chief Minister atan vawiin khan lakluh a ni.
4. Mohan Charan Majhi chu Odisha BJP Chief Minister hmasa ber turin vawiin tlai khan lakluh a ni.

<><><>

CM

Chief Minister Pu Lalduhoma chuan nau piang hlim thihna a tam leh tam loh (Infant Mortality Rate) chu ram hmasawna thlen chin hriltu pawimawh tak a ni a ti.

Vawiina Aizawl Civil Hospital-a nau neihna hmun(Labour Room leh Maternity Ward) Rogi Kalyan Samiti (RKS) sum cheng nuai 95 leh sing 4 senga thawm thar a hawnaah Chief Minister chuan a sawi a. Chief Minister chuan UN pawhin Millenium Development Goals-ah Infant Mortality Rate (IMR) chu tehna pawimawh zingah a telh a ti a. IMR hniam ram chu ram him, chenna atana ram ralmuanga ngaih a ni a ti. Chief Minister chuan IMR tha neih theih nan sawrkar laipui in nu nau hring tur zawng zawng te chu damdawiin emaw sub centre ah ngei nau nei thin turin a duh a, hmalakna pawh a kalpui nasa a, chutianga ti te chu nau neih lawmman te a pe hial thin a ti a. Naupiang hlim thihna te, nu nau chungah boral an tlem deuh deuh theih nana damdawiinah ngei nau hring tura inzirtir a nih rualin damdawiin leh nau neihna hmunhma thawm that ve zel a ngai a ni a ti a. Civil Hospital-a nau neihna hmunhma te tihchangtlun a ni chu a lawmawm a tih thu a sawi a, Health Minister leh a thawhpui, RKS Governing Body chungah lawmthu a sawi a ni.

Aizawl Civil Hospital thawm that zingah hian HDU tihlen leh tihchangtlun, nau neihna room tih changkan, infection control tha zawk siam, damlo te nuam zawka an awm theihna tura hmanraw thawm that, inthiarna siam belh, hnathawktute hmanraw hman tur thawm that leh thul hrang hrang a tel a ni.

<><><>

LANDSLIDE; 3 DIED

Nizan zanlaia Mamit District a Khantlang khua a Sanjiv Chakma te chhungkaw chenna In chu ruahsur nasa avanga leiminin a hnawl a, inchhunga riak mi 5 zinga 3 te chu an thi.

Nizan dar 11 leh Dar 12 inkar vel khan ruahsur nasat avangin Khantlang khuaa leimin in chenna In a hnawl a, chhungkawpa ber Sanjiv Chakma (kum 32) a fanu Kripa Mala Chakma (kum 10) leh an chhungte Tripura atanga lo zin Handori Chakma (kum 12) chu a hmunah an thi a, a nupui Monju Rani Chakma (kum 28) leh a fanu naupang ber Ringkha Chakma (kum 3) chu hliam tenau tuarin an damchhuak thung a ni.

Khantlang khuaa khuarel chhياتna thleng hi hriat a nih ve leh Kawrtethawveng BDO chu a hmunah a kal nghal a ni.

Khantlang khua hi Mamit district chhung Bangladesh leh Tripura ramri dep a awm niin leimin in kawng a hnawh avangin lirthei hmanga tlawh pawh theih anilova, ke a kal a ngai a ni.

<><><>

SPORTS CONCLAVE

Sports Minister Pu Lalnghinglova Hmar chuan kum 2036-a India ramin Olympic a thlen turah Mizo thalai a tam thei ang ber tel tura hmalak a nih thu a sawi.

Naktuka Aizawl Falkland Baptist Center-a Mizoram Sports Conclave neih tur chungchanga sawinaah Pu Lalnghinglova Hmar chuan kum 2036-a India ramin Olympic a thlen turah, ram dang mite infiamna ringawt a nih lohna turin leh India

infiammi a tam thei ang ber an tel theihna turin hmachhawp neih a ngaih thu leh hemi atan hian Mizoram Sports Conclave buatsaih a nih tak thu a sawi.

Sports Minister chuan Sports Conclave-ah hian Mizoram chhunga Sports Association hruaitute bakah India rama Sports Federation hruaitute leh Hmarchhak a Sports Minister dangte pawh an rawn tel tur thu sawiin, an ni bakah hian India ram infiamna lama thawh hlawk tak tak Reliance, Tata, Jindal Group aiawhte bakah Services Sports Control Board aiawte leh Indian Olympic Committee hruaitute an rawn tel tur thu a sawi bawk.

Mizoram Sports Conclave hi naktuk zing dar 9:30-ah Mizoram Chief Minister Pu Lalduhoma'n a hawng ang.

<><><>

CHILD RIGHTS

Mizoram State Commission for Protection of Child Rights chuan Mizoram chhunga naupang kumtling lo hnathawh luih tir an awm lohna turin theihtawpa hma an lak thu an sawi.

He thu hi vawiina Aizawl Press Club-a chanchinbu mite nen inkawm honaah MSCPCR hotute chuan sawiin, tun dinhmunah naupang hnathawh luih tir case record la awm rih lo mahsela diklo taka naupang chhawr hmuh tur erawh an awm fo thu an sawi a, diklo taka naupang chhawr kawngah Mizoram chu a fihlim tihna lam a nih loh thu leh Mizo mipuiten an la ngaihven tawk loh vang zawk anih thu an sawi bawk.

MSCPCR hotute chuan vawiin June ni 12 chu khawvel pum huap International Labour Organisation-in a 'World Day Against Child Labour Day'-a a puan thu leh hun lo la kal zel tur atan naupangten an dikna chanvo an chan a diklo taka naupang hnathawh luih tir a awm lohna atan Mizoram mipuite thawhpuiah an sawm a ni.

Mizoram State Commission for Protection of Child Rights hruaitute chuan tun hnaiah ND&PS Act hnuaiiah Excise and Narcotics ten kum tlinglo 13 an man chu a pawl an tih thu leh kumtlinglo hetiang thil tih tirtu te chu an dem thu an sawi bawk.

<><><>

FIREARM ACCIDENT

Vawiin khan Aizawl Mosque a Mosolman dawr nghaktu hnamdang pakhat chu silai-a kah hliam a ni a.

Aizawl Police Station atanga thudawn danin, Lalnunsanga kum 32 Aizawl Armed Veng South-a khawsa mek ni a inchhal chuan Dawrpui Venga Aizawl Mosque hnuaiiah dawr nghaktu, hnam dang pakhat chu silaiin a kezungpuiah a kap a, pawikhawihtu hi man nghal niin damdawi khawih thin ni a sawi a ni a, dawr nghaktu hi pawisa a dil a, a pek mai loh avanga kap a nih thu a hmuna hmu tute chuan an sawi.

Pawikhawihtu silai hman hi .22 pistol a ni a, a pistol hman chu miin siam tha tura a hna an dah niin a sawi a ni.

He thilthleng chungchangah hian Dawrpui Local Council chuan thuchhuah siamin Dawrpui khawtlang hruaitu Joint Committee thuchhuak ang a Dawrpui Veng huam chhungah mimal emaw pawl ang pawh a Dawrpui Local Council hriatpuina tel lova pawisa khawn an phal loh thu leh ti lui an awm a nih chuan a tul ang a hmalak zel an tum thu an sawi a ni.

<><><>

BY-ELECTION @ SIAHA

Mara Autonomous District Council (MADC) hnuaiiah by-election neihna tur MDC Constituency pakhat leh Village Council Constituency pathum ah te June ni 28 ah vote thlak tur a ni,

State Election Commission chuan vawiin khan puangin, By election a ding turte hming pek luh theih hnukung ber atan June ni 18 a ruat a, a tukah hming pek luh

te endik a ni anga, inhnuk dawk duhte tan in-hnuh dawk hun hnuhnung ber July ni 21 a ni anga, July ni 2 ah vote chhiar a ni ang.

Mizoram State Election Commissioner, Pu Laima Chozah chuan vawiin inthlan hun puan ni atanga vote thlak leh chhiar fel a nih a, a tlingte certificate pek an nih thlenga Model Code of Conduct (MCC) khauh taka kalpui a nih tur thu a sawi.

By Election hi Chakhei MDC Constituency-ah leh Village Council pathum, New Siaha East -II, Lopu leh College Vaih-III -ah te neih a ni ang.

<><><>

PROJECT MONITORING COMT

Mizoram State Project Monitoring Committee (MSPMC) chuan vawiin khan Mamit District chhunga Sorkar hmalakna hrang hrangte tlawhin an enfiah a.

MSPMC te hi an Vice Chairman Pu R.Lalrinawma hova thawkchhuakin PMJVK hnuai sak mek Mamit Residential School leh PMJVK sum hmanga sak tho, District Sports Complex chu a an enfiah a, hei bakah hian Bawngva khaw field pavilion leh Mangkhawngdai Field-a Futsal Ground-te chu en bawkin SASCI leh SEDP sum hmanga Mamit District Multipurpose Indoor Stadium sak mek chu a hmunah kalin an endik bawk.

Mamit District chhunga hmasawna hnathawh Mizoram State Project Monitoring Committee-ten an endiknaah hian hnathawktu Contractor te'n an hnathawh dan leh an hnathawh chin te lo hrihfiah zelin Mizoram State Sports Council Asst. Engineer leh a thawhpuite, Mamit District-a Sorkar hotute leh Mamit Hmarveng leh Luangpawl VCP ten an tawiawm a ni.

<><><>

AP CM

Telegu Desam Party Chief Nara Chandrababu Naidu chua Andhra Pradesh Chief Minister atan vawiin khan lakluh a ni. Chief Minister lakluh inkhawm hi Vijayawada International Airport bul Keserapalli IT Park ah buatsaih a ni a. Pu Naidu-a rual hian TDP, Janasena leh BJP hruaitute Council of Ministers atan lakluh an ni bawk a. He hunah hian Prime Minister Narendra Modia leh NDA hruaitute he hunah hian a tel dawn nia thudawn a ni.

<><><>

ODISHA CM

Mohan Charan Majhi chu Odisha BJP Chief Minister hmasa ber turin vawiin tlai khan lakluh a ni. BJP legislature Party chuan kum 52-a upa Pu Majhi hi lungrual takin an hruaitu atan an thlang a. Pu Majhi hi Odisha ah hian Keojhar bialah tum li MLA ah thlan tlin a ni tawh a ni.

Chief minister atana thlan a nih hnuah Pu Majhi chuan an state mipuite beisei ang ngeia tha taka thawh an tum thu a sawi a ni. Pu Majhi rual hian Deputy Chief Minister pahnih lakluh an ni bawk a ni.

<><><>

NEW CHIEF OF ARMY STAFF

Lieutenant General Upendra Dwivedi chu Chief of Army Staff thar tura ruat a ni. Lt. General Dwivedi hian tun thla ni 30 atangin a hna thar hi a zawm dawn a. Tuna Chief of Army Staff nilai General Manoj C Pande hi tun thla hi 30 ah a chawl dawn a ni.

Lt. Gen Upendra Dwivedi hi kum 1964, July ni 1 ah a piang a. Kum 40 chuang zet sipai officer hna a chelh tawh a. Director General Infantry leh General Officer Commanding in Chief (Headquarters Northern Command) ah kum 2022 atanga 2024 chhung a tang a. Hemi hnu hian Vice Chief of Army Staff ah ruat leh a ni bawk.

<><><>